

worde oder abequeme, eynen andern briff zcu gebin als eynen guten, als diser ist gewest, und^{c)} wir obgenanten vorkeufer sullen und wellen dise artikel zcu sicherheit in unser register und statbuch schreiben lassen. Ouch ob an disem briff schriftt oder insigel icht gebrech oder zcu brech oder icht vorgessenheit geschen were, zcu krucz oder zcu lanck geschriben were, daz sal allis dem genanten keüfer, seynen nochkomenden altaristen one schade syn, sundern wir sullen und wöllen halden und gütlichin beczaln in allir massen, als oben stet geschriben. Dez zcu urkunde und waren bekentnüsse habin wir obgenanten rathmanne unser grosser ingesigel mit willen und wissen an disen offen briff hengen lassen, der gebin ist noch Crists geburt tusent virhundert jare und in dem eynunddreissigsten jare am dinstage noch Michaelis.

a) folgt durchgestrichen vñ b) über die Zeile geschrieben c) folgt durchgestrichen wir

639.

1432 Oktober 4

Regulierung einer Greizer Bergwerksangelegenheit.

fol. 108v Wir gesworin rathmanne czu derczyt der stad Czwigkawe Andreas Wetterhan, burgermeister, Hans von der Alznicz, Hans Horleman, Burghard Kaldenkuchen, Nickel Sthûrm, Nickel Jacoff, Dicz Cluge, Hans Schigker, Lorencz Iseman, Albrecht Clee und Hans Wydener, gesworin rathmanne des jares, bekennen, das vor uns komen synt yn unsern siczczindin rath an dem tage Francisci alz man schreib der mynneren czal in dem XXXII jar Burghard Kaldenkuche, Andres Swengkisgut, Cunrad Guldin und Peter Wendeler, die eldisten des bergwerkes zcu Graicz, und haben bekanth bie yren eydin, die sie Gote und yren erbherrn schuldig synt und by yren eren und truwin, dy sie yren wiben und kindin leysten sullen, daz Grabriel Domasz, obirster burgenmeister, mit anderin amptluten unsrer gnedigin herrn und dy burger der stad Friberg habin beritin das bergkweg czu Graicz von der Wolferstorffer bach by der brethmüle by dem tiche biz in dy Slote adir von eyne grunde bis in den andern, alz denne bergwergek recht ist, und dy czwene bethe adir grunde, dy sullen des selben erbis adir bergis lochsteyne syn und von der unvorsprochin mennir bekennthnisz wegin, dy do obin geschrebin synt, und von der gewerken bethe wegin habin wirs laszin schribin in unser stadbuch czu eyne waren bekennthnisz und merer sicherheit, do Got vor sy, ab on dy eldistin abe gingin, das den gewerkin keyn czweitragt noch in val do geschen moge, sundern on alzo vil gehe, alz eyn berithen erbis recht ist, an allen sachin an argk und an alles geferde von unser gnedigin herren wegin. Anno et die quo supra.